



**SLUŽBENI GLASNIK
NOGOMETNOG/FUDBALSKOG SAVEZA BOSNE I HERCEGOVINE**

**PRAVILNIK
ponašanja članova nogometne/fudbalske organizacije**

Sarajevo, januar/siječanj 2012.godine

Na osnovu Odluke FIFA Izvršnog komiteta od 12. 04. 2011. godine i člana 35. Statuta Nogometnog/fudbalskog saveza Bosne i Hercegovine, Komitet za normalizaciju NS/FS BiH, na sastanku održanom 19. 01. 2012. godine, donosi s l i j e d e ć i

KODEKS ponašanja članova nogometne/fudbalske organizacije

Član 1.

Kodeksom ponašanja članova nogometne/fudbalske organizacije (u daljem tekstu: Kodeks) regulišu se pravila ponašanja klubova, igrača, sudija, delegata, članova organa i ostalih nogometnih/fudbalskih radnika u Bosni i Hercegovini, u vezi sa nogometnim/fudbalskim aktivnostima.

Kodeks treba da afirmiše pozitivna načela u nogometnom/fudbalskom sportu, a posebno međusobni fer odnos i korektno ponašanje članova nogometne/fudbalske organizacije.

Član 2.

Članovi nogometne/fudbalske organizacije obavezni su pravovremeno i dosljedno primjenjivati odredbe nogometnih/fudbalskih propisa prema svim sudionicima nogometnog/fudbalskog sporta, te su obavezni čuvati i štititi integritet nogometnih/fudbalskih institucija i pojedinaca, članova nogometne/fudbalske organizacije.

Član 3.

Članovi nogometne/fudbalske organizacije ne smiju pokušati, niti uticati na klubove, sudije, delegate, trenere i igrače da postupaju suprotno odredbama ovog Kodeksa.

Član 4.

Članovi nogometne/fudbalske organizacije ne smiju pokušati, niti uticati na članove organa koji donose odluke u vezi sa takmičenjem, ili druge odluke iz djelokruga rada organa.

Član 5.

Članovi nogometne/fudbalske organizacije su obavezni voditi računa o ugledu i ponašanju u javnom i privatnom životu, o ugledu nogometne/fudbalske institucije čiji su članovi, kao i o ugledu cjelokupne nogometne/fudbalske organizacije.

Član 6.

Članovi nogometne/fudbalske organizacije, prilikom obavljanja funkcija, ne smiju od nogometnih/fudbalskih institucija ili pojedinaca primati poklone ili druge naknade, koje nisu utvrđene propisima, osim sportskih suvenira.

Član 7.

Članovi nogometne/fudbalske organizacije ne smiju u izjavama za medije vrijeđati ili omaložavati institucije nogometne/fudbalske organizacije, ni pojedine članove tih institucija, niti smiju prenositi neistine i pogrešne podatke o radu nogometnih/fudbalskih institucija i pojedinaca, članova nogometne/fudbalske organizacije.

Član 8.

Članovi klubova i ostali nogometni/fudbalski radnici ne mogu nakon utakmice davati uvredljive izjave za medije o sudijama i suđenju, kao i o radu ostalih službenih lica, na način koji šteti ugledu i ličnom integritetu službenih lica.

Član 9.

Primjedbe na rad službenih lica na utakmici i radu organa koji donose odluke u vezi sa suđenjem i takmičenjem mogu se dostaviti u pismenoj formi rukovodstvu takmičenja i drugim nadležnim organima, u skladu sa drugim propisima NS/FS BiH.

Član 10.

Treneri, igrači i ostali nogometni/fudbalski radnici mogu davati izjave o utakmici samo iz svog djelokruga rada (način igre, organizacija utakmice, ponašanje gledalaca i dr.).

Član 11.

Izjave za medije o radu institucija nogometnog/fudbalskog sporta (saveza, klubova i njihovih organa) mogu davati isključivo osobe koje su propisima istih nadležne za davanje izjava u ime tih institucija.

Član 12.

Izjave za medije u ime saveza mogu davati predsjednik ili potpredsjednici izvršnog organa, ili član kojeg ovlasti predsjednik, kao i generalni sekretar i portparol.

Izjave i komentare o odlukama i aktivnostima komiteta saveza medijima mogu davati predsjednici tih komiteta, pri čemu nije dozvoljeno komentarisati ili davati izjave o radu drugih organa.

Član 13.

Zaposleni radnici u nogometnim/fudbalskim institucijama ne mogu davati izjave za medije i komentarisati odluke organa bez saglasnosti rukovodilaca tih institucija.

Član 14.

Članovi nogometne/fudbalske organizacije ne mogu svojim radnjama pozivati nogometnu/fudbalsku ekipu ili pojedinca da napusti teren iz bilo kojih razloga.

Član 15.

Članovi nogometne/fudbalske organizacije ne mogu na bilo koji način podsticati igrače na neizvršavanje reprezentativnih obaveza.

Član 16.

Svaki član nogometne/fudbalske organizacije obavezan je spriječiti korištenje nedozvoljenih stimulativnih sredstava od strane igrača.

Član 17.

Povrede odredaba ovog Kodeksa predstavljaju disciplinski prekršaj, koji se, na osnovu prijave koju mogu podnijeti svi članovi nogometne/fudbalske organizacije, sankcionišu prema odredbama Disciplinskog pravilnika NS/FS BiH.

Član 18.

Kodeks stupa na snagu i primjenjuje se danom objave u Službenom glasniku NS/FS BiH.

PREDSJEDNIK

Ivan Osim, s.r.